

Grischuns a Reggio Emilia

Ina cuminanza activa e solidara en il 19avel secul

DA GUIU SOBIELA-CAANITZ

■ **Ins na chala mai d'emprender. Quai constat er areguard l'istorgia da l'emigraziun grischuna en l'Italia. La revista trimestriala dal Grischun talian ha gist publicità ina lavur ordvart instructiva davart ils Svizzers a Reggio Emilia en il 19avel tschientaner*. Ils plis da lezs Svizzers eran Grischuns, ils plis Grischuns eran reformads ed Engiadinais.** L'autur, l'istoricher e politolog Alberto Ferraboschi, concluda: «La cuminanza grischuna ha dominà il commerzi durant l'entir 19avel secul, monopoli-sond quasi il martgà da las colonialas e spezarias» (p. 263). I sa tractava da paucs tozzels umans che gievan vi ed ennà tranter Reggio ed il Grischun; questa rotaziun e la differenza confessiunala cun ils indigens han gidà la cuminanza a mantegnair sia identitad.

Identitad confessiunala

La citad da Reggio, tranter Milaun e Bologna, ha num «nell'Emilia» pir dapi ch'ils creaders da l'Italia unida han fatg reviver 1859 «Aemilia», num latin da la regiun imperiala romana situada tranter il Po e l'Apennin. Ins ha stuì distinguer lezza Reggio continentala da la Reggio Calabria maritima. Sin in mut tranter Reggio Emilia e l'Apennin stattan las ruinas dal chastè da Canossa (579 m) nua che l'impe-

ratur Henri IV (1050–1106) ha s'umilià 1077 avant papa Gregor VII (Ildebrando di Soana OSB, 1020–1085). 1409–1859, cun duas interrupziuns pli curtas, appartegneva Reggio al ducadi da Modena. Suenter la chatschada dals Grischuns da Vaniescha (1766) èn var setmilla vegnids a star a Reggio. Ma gia 1743 «era naschida la firma Gilli [da Zuoz] e Bezzola [da Zernez]. En la segunda mesadad dal tschientaner ha la firma Gritti avert in café, (...) probablamain tenor il model da quels da Vaniescha ludads da Goldoni [1707–1793, autur venezian da cumedias, G. S.-C.] (...). Ins ha stuì sepulir 1808 in chavaltgader da l'armada da Napoleón e lura Giovanni Nicolò Bizzari, giuven emplojà svizzer da la drogaria d'Angelo Sandi. Perquai han las autoritads localas creà in emprim santeri reformà (...) numnà pli tard 'dals Svizzers'» (p. 253). Ferraboschi cite-scha ils plets d'in nobel da Reggio 1858: «En il ducadi da Modena èn 2669 gidieus e 202 protestants, quests il pli savens Grischuns, isolads dal rest da la societad» (cità p. 254). En l'emprima mesadad dal 19avel tschientaner èn dentant naschidas trais drogarias a Reggio, quella da Tommaso Perli (Perli da Samedan, 1820), Davide Steiner (da Lavin, 1848) e Flavio Schaffner (da Samedan, 1850). 1843 ha la drogaria Largader (Largiadèr da

Sa. Maria V. M.) survegnì la vendita da l'«Anicione», in vinars dultsch popular cun anis.

Stretgs lioms famigliars

L'autur analisescha ils resultats da la dumbraziun da 1836–1842. El numna tuts Svizzers che stavan lezza giada a Reggio, lur babs e mammas, lur lieus da naschientscha, lur mastergns e confessiuns. Ils nums dals vitgs grischuns e da las famiglias èn il pli savens italianisads, ma transparents per tgi ch'enconuscha las schlattas da noss chantun. In Loretz naschì ad «Interviene» (p. 265) s'enclergia sco da «Hinterrhein», pia Valrain. «Zillia Suan» da «Selvapiana» (p. 266) stat per Cilgia Zuan da Silvaplana. In «Carai» da «Saghens» (p. 269) era in Coray da Sagogn, in «Fosti» da «Fettano» (p. 270) in Josty da Ftan euv. Ils paucs Puschlavins (Olgiati e Fanconi) eran reformads, cun l'exceptziun d'in Battista Armanaschi. La dumbraziun ha registrà la rotaziun da la populaziun aifer las famiglias svizas: «Quellas che possedeavan las firmas eran enragischadas en la societad da Reggio, ma ils segiurns dal persunal eran il pli savens limitads a paucs mais (...). Reto Bezzola, biadi dal patruun da la firma svizra Gilli e Bezzola, ina da las principalas da Reggio en il 19avel secul, fa endament sia atgna esperienza: 'Ils emigrants gievan en l'Italia il pli savens cun 13 u 14 onns, lavuravan en ina ditte da lur famiglia u d'in parent u ami dals geniturs (...) e stavan tar il manader en ina cuminanza patriarcala. Igl era ina lavur dira' (...). Las schlattas Sandi, Tognoni, Gilli, Stopani, Steiner, Perli, Bisazzi e Conzetti eran stretgamain colliadas. La famiglia Sandi per exempel era parenta cun la famiglia Steiner grazia a la lètg tranter Orsola Sandi ed il negoziant Pietro Steiner» (pp. 255–256). I s'enclergia che Ferraboschi numna anc bleras autras schlattas grischunas. L'emprima pravenda evangelica da Reggio è naschida 1875 cul preditgant metodist G. Martinelli. «Tenor Reto Bezzola ha la cuminanza gi in'atgna scola da 1894 a 1901» (p. 262). Ma ils Svizzers da Reggio èn adina restads a l'ur da la vita politica e sociala da la citad.

* **Alberto Ferraboschi, L'«aristocrazia» del commercio. La comunità svizzera di Reggio Emilia nell'Ottocento. En: «Quaderni grigionitaliani» 3/2005 (Pro Grigioni Italiano, ISBN 88-85905-61-7), pp. 251-272. Addressa: Martinsplatz 8, 7000 Cuir.**



La citad taliana da Reggio Emilia.